



*Sabtu, 03 September 2022*  
**Ogen: Esekiel 48:8-22**



**Iserapken Man Tuhan**



**N**ai pengajaren nande man anakna adi lenga ku rumah bapa man, iserapken nakanna ras bengkauna, gelah ula nakan si enggo ibuati entah pe sisana man bapa. Pengajaren e tuhu mehuli, encidahken kehamaten man bapa selaku pengulu jabu. Kata Iserapken e nuduhken kehamaten.

Tupung pembagin taneh si ibereken Dibata man Israel, ipersingeti me bangsa e gelah nerapken taneh man Tuhan. I tengah-tengah taneh e lit gedangna 12,5 Km, belangna 10Km, iserapken man Tuhan. I tengah-tengah taneh e me ipajekken rumah pertoton. Taneh e igelari taneh si badia. Bagin si iserpaken man Tuhan e me bagin taneh si mehulina kal i bas taneh janah si e la banci sitik pe idayaken entah itukarken janah la banci sitik e idayaken. Taneh e badia kap janah e sikerajangen Tuhan.

Alu nerpken taneh si mehulina man Tuhan si inganna pas i tengah-tengah kuta, e nuduhken maka bangsa e mehamat man si mada kegeluhenna. Serapken si mejilena ngatakensa labo sisa-sisa si bereken man Tuhan, entah bekas si enggo si pake tapi si badiana, si lenga pernah ipake kalak si deban. Litna taneh ingan majekken rumah pertoton e nuduhken maka Tuhan lit i tengah-tengah bangsana. Tuhan si mperdiateken kecibal bangsaNa dingen jadi pemimpinna.

Nggit nerapkensa man Tuhan e ngatakensa nggit teruken asa Tuhan, nggit tunduk man Tuhan, labo banci seri sekerajangennta ras sekerajangen Tuhan sabap IA kap si mada taneh ras isi doni enda. Kai si iberekenNa man banta e tuhu-tuhu ban perkuh ateNa, iberekenNa pe taneh man banta jadi inganta erdahin labo ban beluhna kita, tapi e kerina pelin-pelin perkuah ateNa. Bujur nge adi man baNa kita mehamat. Sabap IA pe simehulina kal lalap atena isehkenNa man banta. Ia nge si ngaturken kerina kegeluhennta. Adi paksa si gundari entah lanai taneh si man serappenken man Tuhan tapi ulih pencarin, waktu, diri, gegeh, kengasupen ras kerina isi jabunta.